

太

函

集

大函集卷之七十三

新都汪道昆伯玉著

記六首

湖廣巡撫都察院記

古者天子使其大夫爲監監于方伯之國今巡撫是也高皇帝疆理天下分部而置三司歲遣御史按部中脩慶讓而已脫有不治則特命臺省大臣一人行假以便宜事畢反命其後三司柄事日削多擁格而無所受成于是諸重地建撫臣都御史遞出矣楚列郡什五二州附焉境內分王諸侯王開國相望

先帝湯沐在楚視都邑同兼以保界三苗比隣百粵
江漢當四瀆之半九谿七澤囊括其中雲夢洞庭故
爲盜藪要以輯和鎮靜宜莫如楚難何以故地重故
也都御史出鎮都會治武昌故居倍澤面山獨坐湫
隘居者率憚改作迄于今相仍 上四年冬粵西張
公自南贛至謀諸方伯監司連帥若守吏改卜鳳皇
山之陽負郊壇抱陂水西出睥睨則大別捍江流而
東東則泮宮又東則澤宮脩文之象也乃命有司拓
地程物鳩工辨材命筦庫出公帑五百金民間悉無
所預予居西楚聞旦興工人言張公未及下車不憚

徵發以從大役藉第令得楚楚其皆信張公平且
楚今無年非時矣予聞唐虞茅土而治夏后氏卑卑
承之乃若斯干閼宮周人不以其故貶美三閭憂楚
直將術紛冒以啟君心至其脩辭凡在居室靡不潤
澤鄴侯以儉師後世未央之役將令無以加焉彼其
有冒無心難與語此矣當世之蠱者二其一陵替其
一因循兩端相乘不勝其敝蓋自直道亡而忌諱衆
善仕者務姑息以市人心利害較然朝不及夕彼猶
逡巡卻步幸須臾無及於其身即有不支事倍工半
則它人任之矣將以省費適以滋費將以休民適以

罷民此因循之弊也抑或瀆名器削廉隅可畏非民赫赫何有久之波流第靡莫爲之坊及其滔滔何所不至甚則履加于首城覆于隍此陵替之弊也在禮君子以禮坊民國奢則示之以儉國儉則示之以禮當周之季其民若在倒懸自主許行倡議以紓民之急孟子惡其倍禮直以夷狄進之叔向謀齊唯禮可以定國有以也楚故棄禮之國周南之遺風在焉比年地利不饒農事不治無論齊民編戶即公家無所芬華儉可知矣昔在嘉靖幸郢封鄖緹騎金貂相屬于道部中百執事咸在率務貶損以明有尊衆庶幸

自託於帝鄉睨之久矣即惠文玄武視若弁髦夫以纖儉之民因之以無方之俗猥云從頌難與慮終往予三過夏門目攝開府列郡于此乎觀禮湫隘之謂何楚未息肩卒不遑暇張公故以直言顯則所謂骨鯁之臣負俗獨行非彊有力宜不及此予方有事鄖署其費不能百金乃予心猶或兢兢此予不及張公明矣居數月則予自鄖代張公既入武昌張公業已出境有司奉張公之畫不旬月而告成功于是直指使帥方伯監司連帥若郡大夫逆予以長至入則自故居除道西園梁陂而屬于應門門外可容旅士

千人車徒百乘方軌四出列栢周藩望其門軒如也
廓如也足以布法入門而歷馳道登露臺廉遠堂高
虛明爽塏堂下右陳朱轂左列韃橐升其堂翼如也
隆如也森如也灑如也足以觀民堂後疏戶以居豁
如也足以咨諏其後爲燕寢寔如也耽如也
足以退息最後爲樓居四望山川城郭奕奕如也泱
泱如也言言如也足以省方而攷俗室東爲石蘭室
西爲陽春園草木叢生林林如也足以供宴游壯哉
居乎孰任其勞孰享其佚不暫勞者不永逸其謂是
與夫官舍不啻蓬廬不待智者辨此矣當張公決筭

豈固欲長子孫邪弊則埽而更之且與來者更始親
于其身首事卒以待所不知者何人推是心也爲而
不宰有而不居皆是物也予茲得代無能率張公之
舊以新吾民覩河洛而思禹功則俟後之君子其必
脩禮以示民極使知嚮方若在岐豐矢文德以洽四
國則是天授張公以重楚而又藉手于後之君子以
重張公即予不類以瘡疣居其間不爲病矣方伯監
司連帥若郡大夫請紀是言以告來者遂勒石臺門
之東

黃鶴樓記

故劉中丞入楚楚父老請治黃鶴樓中丞曰嘻明
詔加惠元元始得及於休息楚病矣慙何敢議遊觀
父老曰不然古者省方觀民必有以也以明天時則
觀雲物以保地利則觀山川以察人和則觀謠俗執
政者慎諸此其孰能廢之故君子遊焉小人休焉君
子觀焉小人比焉父老望公久矣中丞曰嘻楚方不
歲寧詎輕用吾民顧今近屬不共詔從吏訊荆蠻負
固師老無功善從政者以時行父老姑待我明年遼
庶人當不道廢勿王有司夷故官其材可當大役頃
之乘木浮沅湘而下皆川衡上材長十仞有奇足任

主器津吏以告轉而致之工師又明年荆師獻捷父
老更進曰楚故有京觀以表武功彼封戮餘以爲名
無不祥大矣乃今野無暴骨一舉而俘叛人罷材官
弛疆事功之上也請以樓易觀父老帥諸子弟請畢
受功中丞曰嘻以宗廟社稷之靈師出而獲戎首
懃幸得免于席藁疇敢自功是役也力詘舉羸毋勤
父老於是方伯監司若分部相與計曰材物既具所
不足者非百工與諸大夫任之悉發刑徒以佐將作
工舉矣既得請計日而畢工徐大夫中行氏入鄭以
中丞之命來告楚有勿亟之役賴諸大夫國人贊之

成明公儼然在邦域之中請紀成事不佞拜大夫之
辱避席終辭中丞得代踰年不佞自卽來徙諸大夫
立石宇下請從中丞平生之言譬則甘棠其人往矣
其言在耳不佞寧忍負之楚爲南國隩區首被文德
嗣是伯者代起厥有雄風文物聲名猶可槩見槃游
則章華高唐蘭臺石室辭令則左史倚相觀射父屈
原宋玉唐勒景差學士至今誦之煌煌乎烈矣黃鶴
由酤者顯載在稗官考文則不典於先民程度則不
登於舊物顧千載而下唯此歸然獨存揆諸地宜其
得勢然也彼其該七澤亘三湘揭夏門當大別視碣

石之表東海不然乎哉乃若扼吭江漢之間非師武
臣力不守登樓坐嘯率倜儻竒偉之士在焉將固廢
之必有興也由斯而論其世污隆可得而言自熊繹
受封歷世滋大迄于問鼎其張可知齊侯執言服江
黃以賓楚即方城漢水誰能去兵其後封疆之臣守
在什二雖陳搏俎不廢戈矛此用武之區彼一時也
皇祖以六師下楚胙壯王填之爰及世宗楚居首
善當世三公四輔遞登楚材文治脩明韃橐不用執
政若諸大夫若諸父老幸而及此時也不亦恬愉乎
哉樓制故庠不足以稱明德天意與之更始而藉手

於中丞徙木程材人力宜不及此先事之不墜非後
事者之資乎顧不佞受成無能布德意以周境內乃
今歲有水溢藪有逋逃民有流亾士有失職於天爲
憐時于地爲侵紀于人爲干和重爲諸父老之憂咎
在不佞諸大夫幸而在事其無棄不佞而朝夕脩之
力此三者以保有終無爲故中丞之辱是役也由前
則諸大夫成之由後則諸大夫保之豈惟諸父老之
休不佞幸矣

太和山記

我國家尊大岳爲帝時帝玄君昔帝降于廩今治

故宮曰淨樂其東當始降之室治紫雲亭去州五十里入西南表峽口曰玄岳環中山四合溪流出入無端負坎抱離可當吉土 文皇帝跡異人所在爲之築遇真宮異人遺杖笠悉留中命尚方鑄金象之歸守者入僊關爲元和觀西入馳道其南爲玉虛宮山水脩廣倍遇真舊爲武當縣南山如負展信非玄武不足以當之宮制視漢未央即祈年勿論已其西池亭洞闢亦異人所棲西上望僊樓儼然若將有遇也馳道西爲僊桃觀通八僊臺又西爲華陽亭跨石橋臨夫容沼西出則田廬雞犬亦爲一區去玉虛躡西

南進次迴龍觀大玄觀入紅門通房陵道道傍有太
上巖巖中鑱石象太清其左二龍蜿蜒巖石下又南
則八僊觀中堪輿右入七里溝脩木千章如突夏綠
岡爲開山故道遺巨石在焉賓太上爲羅公巖高出
絕壁往年屋之居羅太史凡七楹舉目望西南諸峯
盡在目眦反紅門入官道進次太子坡陂陲中分扼
其昵爲復真觀周垣跨道逶迤高下因之出垣下行
乘天津橋濟九渡澗澗道幽絕其陽則淵默亭沿澗
東入玉虛巖石嶂夾流若干里嶂若步障雜樹繪之
深入石磴浸高若自明河趨閣道磴窮則棧棧窮則

巖巖上視有龍虎文其右雷文故中奉帝居右奉雷
部西南望則天柱當峽中循故道還由淵默西南上
除道曲折望行者如登閬風紫霄宮附展旗峯石嶂
崇廣皆數十百丈三公五老前侍亦一隩區宮制高
倍玉虛脩當其半奉祠者無慮數千指其廬率高下
居宮前爲禹跡池築小亭出池上池右福地其陽爲
賜劍臺其陰則萬松亭出木末太子巖出宮後亦有
亭由禹跡右旋古道甚治乃今多徑者廢勿行古道
西上當南巖之南舍南巖西歷黑虎巖泉石相望于
道昔有巢居者遺構猶存進次杉木林分二道其右

下行涉澗遵宿莽容單車峽中轉入西南出峽爲清
風岨蓋故韓糧道也左上行躡萬丈峯下登朝天宮
其東由鳥道出三公巖則上巖也路險絕不容足學
僊者劉媪居之其下亦爲三公巖相距三舍巖南鄉
爽塏可居然必取道玉虛巖多歷險阻始得至朝天
西上拾級八百五十有五當天門三天門皆寶石峽
中有巨靈斧跡初入門降數等稍平行依三公峯爲
文昌祠過祠則摘星橋橋下澗水如神漢緣絙出天
梯上梯如竿揭雲端距躍五百達重門足力竭矣倚
試劍石箕坐更百步達三天門由此折旋而升坦行

數百步歷階南下又折而東上爲太和宮宮面南香
爐蠟燭三峯當席宮前則先朝神室徙置于茲由南
天門入紫金城丹梯九轉出天柱峯絕頂範金爲黃
屋承以瑤臺帝位中央羣神列侍精美奪目儼若化
人之居即今之國工宜不及此正位東鄉高出七十
二峯如羣弟子侍先師莫不齋立近則金童玉女峯
二當膝承之左三公右九卿帶七星揖五老僊人隱
士順風而翔白雲出沒衆壑間如觀陸海諸峯或如
碣石或如蓬萊鉅如斷鰲幻如結蜃細如漚鳥脩如
北溟之鯢維出如珊瑚枝浮如萍實累累乎如鞭驅

石汜乎如漢使者之乘槎遠而望之方城一耜漢水
一瓠掩楚蜀略周秦卽嵩華衡霍匡廬峨嵋悉辟易
無何有之鄉矣乘磴西下爲清微宮僻居深谷中其
制不廣然以幽勝妙華巖著焉南巖當太和之陽宮
北面據五龍之奧宮右石延覆於道其上有巨人跡
若倒懸宮後卽南巖脩數十丈高數丈巖下峭壁數
十丈東西脩數百丈如高墉巖中列祠事三亭二卽
神山多倬詭此爲擅場其下有禮斗臺徑絕罕至西
出如乘墉右上躡飛昇臺其旁露臺臺當志心石臺
端有蛇徑通一室當其杪以居宮東北歛火巖亭附

巖畔距展旗峯近下視紫霄展旗北爲尹喜巖今居
比丘脩不二法由南巖宮下爲滴水巖僊侶巖度竹
笆橋入青羊澗青羊巖當澗之曲虛無廬渡青羊橋
躋五龍千步而峻門垣九曲始達應門宮制九重前
列階八十有一後七十有二至高矣左高殿奉玉像
五相傳掘土得之其制不異庸工好事者神之耳宮
前有五井天地池日月池宮後當五龍峯其上有五
龍池則其窟宅也凌虛巖去宮五百步一黃冠居之
每飯必有餘以待衆徂衆徂皆喜否則破釜餽去莫
之誰何巖前則希夷誦經臺今尚盛臺出臨澗當其

上爲亭去宮五十步爲自然菴故有鍊丹池今始復
出五龍渡磨鍼澗過隱僊巖巖虛明視北道諸巖爲
勝次繫馬峯爲仁威觀繚垣方廣數十丈石渠衡之
就中爲石梁當門以度出茅阜峯下爲五龍行宮地
始平脩廣楚楚過此則玉虛道也譬之宮室過真爲
垣屋玉虛爲廷淨樂爲沛宮紫霄爲廣內太和則帝
坐也南巖五龍清微之屬皆爲離宮朝天爲掖門元
和爲象魏迴龍復真仁威行宮皆行在耳語規制則
首玉虛次淨樂語形勝則首南巖次紫霄次五龍至
若羣山萬壑泉石巖阿各擅一奇更僕不可悉數大

都天闕靈秀以待明時帝力神功于斯爲備且也稽古定制不籍有司逋遣中貴人藩大夫掌其禁令以故草木茂鳥獸馴其斯爲地道之章游觀者之至樂也人言山羸水詘猶若有憾焉夫右灋灝左滄浪江漢交流振以鄂渚二別則玄武之象外戶在焉日觀孤高下臨湯谷古者海岳爲匹亦通山澤之義與彼規規而闕一隅是以趾臣目者也

太和山記二

余三仕楚太和並載方祀中戊午冬余以二千石至從所部脩祀典三宿太和天雞鳴輒登絕嶺觀日出

下視無際熠若燭龍之躍九淵頃之天門開始辨色
山積雪如羣玉觀益奇乘興過妙華巖就辟穀者與
語獨歸齋室從者莫知所之比下南巖循步欄望天
柱皚皚乎五城萬雉夫非白玉京邪俯闕五龍冰雪
塞路不果往過紫霄履雪出禹跡亭上若從蒙莊子
游徧歷福地亭臺奄忽昏暮月幾望對展旗峯如雲
母屏歸臥神樓屏明燭戶牖生白視懸寓若冰壺蜚
起登太子巖過巖棲者相揖出亭下下紫霄行者肩
摩入山如市一徑東涉澗徑玉虛巖澗道陰陰人跡
幾絕避喧而見獨不亦僊僊乎哉暮抵望僊樓月滿

魄明視紫霄較甚旦日歸矣簪之染指曾未屬厭辛酉將入閩乃再至橐中載父乙爵襄王孫遣歌者從余先入玉虛巖雨大至巖中望雨如機絲百丈引澗中澗水盈從者後至皆沒馬腹止巖下宿從黃冠飯黃梁明日次天門余下車納屨以往車人曰無畏請以肩輿登於是駕壯夫二人百步遞更代若搏羊角而上薄太和將事及期雨不絕從祠官造帝所卽擁蓋猶霑衣至則天劃然開雲如席卷明霞奉白日出當黃庭禮成雨復集人人以爲神應雖余亦不知其繇旦日周游載酒復登絕頂當軒奠父乙爵稽首颺

言道昆幸得服事名山亦越三祀今且辭去請飲餞以行乃長跼舉醕者三徧禮羣神醕各一其右有奉劍者余挺劍出之祝曰寇數入閩願借太阿以張國討振衣而下天將當關余舉爵進曰公以赤心奉至尊不佞庶幾可質引滿立飲醕如初下摘星橋軟流水歌者進爵爲天風之歌頃之天籟皆鳴若相倡和余以爲鈞天之樂戒勿歌由南巖趨五龍所至皆信宿道中樂青羊澗別業樂誦經臺行次玉虛月望矣登樓命酒以次觴列僊至洞賓觴者二公好飲則真吾師質明發滄浪從此出境後十年至余將出鄖關

望夏門柳侍中請行期先期往乃燂湯治浴室逆余宿沐浴堂明日由間道入羅公巖道中饒木石苑積不治假令刊木疏石宜多奇始至望天柱諸峯猶宿雲際無何浮雲立盡如出青夫容既而明滅縱橫如羽衣如縞帶已復盡冉冉如跼鳶余宿羅公房六月衣袷明日盡東略乃出復真過玉虛巖不果宿尋登福地有禰樹樹掛劍松下拔劍斫之五夜雨師清路塵旦日杲杲侍中命工除間道余乘小車登太和日方中其下五色雲見祠官以告侍中亦自南巖望見之既禮玄君退就南榮嗒焉隱几居有頃起而周視

舊游諸峯變幻多神奇卽三至未可僂指曳杖出香
爐峯側命黃冠據其上作步虛聲間以洞簫奏雲門
曲興盡乃反質明就道憚乘危杖至摘星橋指橋東
遺址是當閭闔扈三公宜祠事文昌以應天象次萬
丈峯下刻石爲銘過南巖侍中語雲物狀余聞諸有
道者具在山中開士周恭亭居玉虛西臨舒復初石
敎會居柳林佛子圓性居尹喜巖獨顏希子出就鄢
郢周故宦者事靖江王性通明善悟入與柴山人相
師友竝稱法眼云舒善長生之術深入無生具大辨
才其先爲柴山人弟子石故秦將西域法王子崇事

之圓性祝髮京師具法相目攝諸徒屬卷舌不談談
則纏纏不休適其意所欲出余先以使往畢爲之期
余留南巖石子先至余執轡聞與語石灑然公豈宰
官身邪不揭不厲而登彼岸其未也坐待明月琴師
就巖中奏琴旦日間尹喜巖過佛子巖東北向門外
多美箭爲藩巖中列兩楹虛其中奉佛佛子肅客入
坐客當中雷既而謝從游引客入臥內摩客腹私語
佛邪佛邪由往劫以來乃復相見抱膝就客疊疊多
所開陳已而謂客喜游請先客乃授客杖先從竹徑
出澗濱磐石據澗交流隄其下樹水草傍一巨石出

臨岸斷木作曲闌當之咫尺若在濠梁其幽致可入
繪事巖上草木益茂柴荆爲周廬者三中有蓮池池
水四時不涸池上一室蓬戶室中置繩床戶外竝列
招提懸彩幡作滅度法池外一池差小自爲一垣垣
中花木成畦多芳草其後由華門入中爲草亭方廣
當身設坐具亭前分列八石宜坐門徒客笑曰公所
居足稱精舍公安事此其遊戲三昧者邪佛子曰嘻
此故豺狼居耳吾日事樹藝遂成園林客勉矣出就
谷口客迴車旦日期周子五龍宮周後至中道遇暑
雨畢易衣屨始相見西齋周告勞余不欲煩以口舌

乃出日月池上過誦經臺羣雉遞鳴山梁不避人語
侍中請臺端行酒列炬乃歸旦日次行宮石子將舒
子至舒卽次以機投余石數目余機不入石笑曰公
將以聞見取乃今不涉聞見惡乎取之故不入也語
未卒相與過玉虛列坐月明中將叩實義會侍中倦
而思寐罷勿談明日登望僊樓語其概乃余猶多扞
格然亦有味乎其言是夜月始盈遂還行部計期則
十年周矣余適有天幸十年三游始與貴游者俱局
趣不自得再至則余爲政然亦不失爲俠少游乃今
吊詭得朋視昔游爲猶賢矣要以游方之外時而汗

漫時而逍遙其斯爲采真之游余未能也

試院記

今天子改元萬曆歲當賓興京兆尹首獻士太常如
令甲事竣監察御史吳從憲周詠上言 國家脩文
治餘二百年制度悉備諸省各治貢院遞以壯麗相
高其在京師四方于此乎瞻羨重以三載校天下文
武士制有常頃臣等從事試院中顧獨湫隘不治往
聞諸司數以爲請部議主勿更乃今無論廉近堂卑
夷於部屋即簾以內分試號局一室當戶而炊簾外
東西分區板屋不蔽風雨諸士子往往嚴夜燭或病

濡裳內外垣故卑宵人易屬耳爲幻院外委巷僅左
右達多士蟻附于門行者枳不前輒蹂躪什七八迄
今不治其何以稱首善而隆上都乞命將作新之此
一勞永佚之計也會獻歲士與計偕且至期日不遑
既而工科都給事中吳文佳左給事中朱南雍遞以
爲言 上下工部議於是尚書朱衡帥諸司躬視諸
不便狀誠如臺省言咸與維新宜在今日更之便
上從之於是計工費三萬緡什六出大司空什四出
京兆尹計人徙三萬指則大司馬發入衛良家子各
以期日受工乃拓民居八百二十三廛給少府錢七

千一百餘緡皆過當得地方八十丈深不及廣者四
弓於是請命靈臺諏日興工得夏四月旬有一日
吉乃定部署首建內外堂堂各增兩楹皆七達視昔
廣三之一深亦如之分試比廬異庖莫不爽塏周闢
更闢夾道內外斬然各所異垣門悉置廳事明遠樓
高倍昔四隅各增一樓故士子舍以塼埴易之無患
風雨院外闢地可方九軌都涂四達無留行晝既成
屬諸郎爲植無何尚書衡得謝上命郭朝賓代衡
申飭諸郎壹如成議越十月工告成於是輪奐堂皇
岑樓突夏高明閎廓翼如軒如鉅不呈材細無遺力

庶幾乎象營室儷文昌人文之觀美具矣司空謁不
佞紀成事則以不佞習典文武試宜知言竊惟三代
之英率由耕稼版築漁獵起一旦遇合人主輒授之
秉而將相之固未嘗申之紹介謀之羣臣一何廣也
周禮澤宮以射論士而慶讓及諸侯法駸駸數矣絜
其所得士安敢望疇昔若而人此其徵應之符廣狹
較著 高皇帝重經術恢恢乎設天網以該萬方于
時不煩有司真材畢進不可謂不廣矣其後纍纍于
進間以竒表於是有司之令煩不啻數罟甚則所求
非所獲所獲非所求察吞舟而得鰕鮒罟有何賴顧

今解額日廣豈不濟濟足多論定而官諸賢者勿論
已抑或斗筭從政不伎則求訛訛訑訑黨同伐異概
諸直道寧詎有胃而無心不廣甚矣 上與羣臣更
始首下 明詔詔之廓然務正人心共期于蕩蕩平
平之治窮則變敝則新此一時也夫廣則士重不廣
則士輕輕則日偷士重則否即今不容貶法以阿曲
士將不爲良士地乎起敝維風則在此不在彼矣
上方躬節儉務休息顧茲改作無難殆將濯習見而
作新之凡以虔其始也古之君子過門必式過廟必
趨一舉足而心存矣士居常以廣居爲口實作新之

謂何異日由此發身所不概於心者非夫也雖然象
教則能者從身教則觀者化螟蛉之化也以祝鷦鷯
之化也以視蚊蜉且然故善化者宜莫如人心顧躬
化何如耳意誠心正其廣可知此身教事也至司第
身以人事君之義壹以君上之心爲心千里之外
且應之於及門何有聞諸先聖取人以身不佞有味
乎其言敬告後之在事者

何文簡公祠堂記

嘉靖甲申張文忠以議禮進時何文簡都少宰上書
力折者三既文忠條列十三事以聞文簡夜草疏歷

格其議旦日入奏帥羣臣伏闕號泣待命上怒下羣臣吏文簡奪歲俸量移南京工部左侍郎戊子明倫大典成卒坐首事免文簡丙申五月朔文簡以正考終伯子仲方舉孝廉仲子仲平入太學則爲主貌文簡猶以田間冠服祠于家二子淪亡文簡不祀宗人立繼子叔震代之丞嘗門祚中衰祠事廢矣丁卯穆考即位首錄世祖直臣有司舉故吏部左侍郎何孟春事聞乃得復官賜謚如詔令辛未不佞撫楚知公產楚之郴州計且行縣式公之間無何遷去再代而汝陽趙公至是爲公門人趙公以問俗

及柳拜公祠下則繼子叔震方坐逋負祠且爲墟趙
公憮然太息曰嗟乎先朝骨鯁之臣我公其選也
始操直道明主不庸卒以家食終身世嗣不振阨
矣阨矣迄今祠事不治謂有土者何乃檄郴州發篋
庫新其祠會守吏胡漢始入柳訖其役守易公主爲
冕衣裳請歲編守者一人供灑掃報曰可且走一介
行李將趙公命謁不佞記之竊惟旦望相燮伐而造
周夷齊抗直言而餓死是各一道也顧夷齊不以旦
望貶節旦望不以夷齊貶賢規貞矩方其至一也仲
尼有言子之愛親命也不可解于心臣之事君義也

無適而非君也無所逃于天地之間故因心以致孝則莫大乎尊親文忠是已蓋義以納忠務引其君於當道文簡是已言出而遜於君心其入則易言出而逆于君志其入則難易入者非將順則揣摩難入者非犯顏則逆耳故易入者不必微福要之與福爲徒者也難入者不必速禍要之與禍爲徒者也斯時也文簡職不過少宰官不過侍郎語官守則有三事六卿語言責則有臺諫藉令毋將順毋揣摩毋微福於文簡無失矣寧詎必其爲犯顏爲逆耳皇皇然速禍爲哉大臣以道事君文簡近之矣論者謂文忠雖賢

不登於旦望乃若文簡直亮之節視夷齊若在鴈行
知言矣我國家親賢養士莫盛於孝宗一時弼
直之臣悉皆弘治所樹者也世祖高拱久矣諸言
者駸駸以默取容或以士氣凌夷自文忠用事始爰
及末載執政愈益馮陵薄者放流甚者肆市蓋竊三
尺以箝人口則又伯者之罪人天定亦能勝人至于
穆考而文簡始顯上之成世祖之孝下之勸人臣
之忠好事者猶或以爲不然是昭違而塞德也今
上踐阼首下明詔以正人心直將求國是於正言必
得諤諤如文簡者斯可矣粵自三閭以忠狗楚故楚

多直臣汝陽方爲楚監承上德意而布之境內顧
惟祠事文簡爲汲汲蓋欲張楚以風四方且也祠仍
其舊則不煩像從其新則不悖用出其籍則不費與
事責之有司於民間無所預則不勞無慮彰往勸來
行一物而四美具矣是舉也豈徒及門受命云乎哉
文簡忠孝大節具在國史若鄉評不具載

太函集卷之七十四

新都汪道昆伯玉著

記八首

寶應縣學田記

國初縣諸生額二十一。一切廩縣中彼業已治。博士家言非代耕無以糊其口食。而後教斯教之所由興。與其後增附弟子員無慮什倍以上。然皆不及廩。僅復其身。大都士斌斌日益加。而廩有制不可越。故造士務廣遵。祖務共。兩者皆是也。縣中歲獻士壹以廩先後爲差比。及三歲賓興。無論廩能者進矣。今天

子申飭功令廣厲學官則以廩者不必皆良程督日
至乃今莫不廩廩務先事以當上心夫廩者不必
皆良固也即良矣其餘不必皆無良不必皆良則食
浮於人不必皆無良則人浮於食將欲稱物平施其
無遺慮乎哉夫羣之學校則同而廩不廩異廩不廩
則異而復其身則同故士既籍而復其身政以相授
廩者之不逮耳復其身而家給之猶之食於人者也
其間肥磽異地豐凶異歲勤惰異農藉第今無年即
廩者猶將不給勿問其餘矣古之王者家中國而子
兆民凡在夫家猶然務恤其難阨士則子之雋也胡

爲獨後於細民然則爲之授田以待凶真良有司事
比歲淮河水溢轉徙而東襄及廣陵寶應爲甚歲蠲
租發粟曾無及于罄罄上即位初縣大夫始入境
日孳孳問疾苦畫便宜輯流亾足里戶程物力繕隄
防明年罷民洋洋焉有起色顧諸士之涸猶鮒也安
得升斗而活之曾經牧地近郊故無水患召民開墾
歲稅百緡請以是爲諸士資直小而未徧耳四顧境
內皆水不啻望洋獨八淺田一區若枯浮水上按籍
得罰金百二十請市之歲徵三百鬴有奇儲學舍於
是諸貧出來告食授粒焚授膏婚授禽當大事者授

具履畝有籍徵租有程歲出有經歲入有會士享實
惠且速視廩者復者爲猶賢余出淮南所部亟稱縣
大夫治行第一至則諸士郊勞因得學田事益詳其
言曰邑人不天艱食久矣諸生閔焉望歲歲益大侵
卽匏繫學宮廩猶亾廩也復猶亾復也又焉得食縱
有司不怠濡沫安敢徼惠西江之水邪不自意得李
令君授常稔之田以賙不贍自今以往將饗其賜於
無窮請勒石記之庶後事者可師也余方奉 詔歸
省亟謝不遑顧諸士之德縣大夫則以饗其利矣余
聞縣大夫長者其政緩催科而急撫字終不以殿最

渝其初彼直以稍食詘而均之彼直以子之雋而亟保之非樹德以也夫既廩稱事羣工且然高皇帝之廩諸生良以食有功耳其君用之則安富尊榮其子弟從之則孝弟忠信此其功足食也後世汲流弟靡旅以素餐卒之所養或非所須焉避科察寶應爲淮海下邑故以符瑞得名乃今所寶非賢乎宜必有應者近若朱氏後先照乘蔚爲國華顧塗趣而功不終惜也瘠土之民勞而義赤地之獲勤而登假令侵於物而穰於人隋侯和氏出矣爾諸士抱不素餐之義其在斯乎夫惟士爲有恒心不則凡民等耳諸士

非有待而興者願毋忘縣大夫縣大夫聞而避席曰
涑之爲是舉也則官守在苟可以爲諸士地惡乎不
用吾情司馬公先得我心請以是誓諸士縣大夫舉
隆慶五年進士鄆都人

耆園徵會記

今少主訪落而興太平卿大夫濟濟在事諸耆舊被
推轂者猶得釋疆場而弛負擔四年春不佞在晉中
丞若方伯家食監司居廬會司徒京兆過里門刺史
謝漢陽後至乃就河西爲高會盡鄉曲驩既司徒京
兆之兩都吾黨胥後會歲日南至中丞始耆時方有

事菟裘爲園璋溪之上不佞見客命曰耆園中承先
期誓閭人毋內賀者其言曰太夫人在是歲爲大耋
之期余業已受戒太夫人不稱賀余今猶在子舍寧
詎敢以羞賀客勤太夫人閭人惟命不佞既聞是言
也則面謁中丞河西既盟惟是二三兄弟胥命璋溪
之上耆園訖事且於是乎落之中丞覽揆之辰與行
會即不得請過旬且閉關無亦廢齊盟曠歲事異日
者聞之司徒京兆其將謂二三兄弟何抑吾黨有成
言毋視他客於是遺書方伯監司刺史會如期方伯
宣言曰珍聞之古之會者必有言諸君子於此言矣

監司曰諾大賓學詩者也請稱詩陳之衡門隱者之所爲作也周道非矣安能作有虞氏而賡喜起哉隱者去健羨就棲遲彼一時也今上達聰明目惟遺佚爲耽耽頃當卿士言行且授中丞事矣乃今五畝侈于衡門璋溪可以當泌資適逢世固非其時元老壯猷方叔所以佐中興也中丞六十之年始至旅力方剛其由此而謀國家爛焉與顯允爭烈無用耆園矣刺史曰金學易在賁之家人外止而內文明丘園之賁也要以終吉曾何病於皤皤明而動則豐宜照天下其用殊矣故動則天下止則丘園其變不居惟

其時也耆園何病邪不佞幸以禮起家何知禮意嘗聞孔子問禮於老氏竊有異乎其言聖人無譽于人顧獨歸之龍德其曰禮者忠信之薄而亂之首也孔子奚取焉夫禮承天道而治人情老氏言治人事天莫若嗇孔子以儉爲禮之本禮失而求之野人嗇也至治之極隣國相望雞狗之聲相聞民各甘其食美其服安其居樂其俗民至老死不相往來此老氏之所以治民事天黃虞以來率用此矣降及中古曾不聞以嗇名蓋後進君子始名之則周之季也不佞從中丞監司刺史同及孫文恪公之門公嚮中丞相人

者江生適公所江生譽中丞不容口公領之且曰吾固知方叔子羞蔡澤不爲吾將卜其年耳江生曰叔子神內王由不輕用故不彰吾惡得而相之也之人也可五六十可六七十可耄可耄可期願年何可卜也公愕然曰方五六十之去期願驛遠矣有說乎對曰夫人之用神猶委吏之發廩也粟支十歲顧所用之用之舒則十歲而有餘用之數則旬月而不足故用以坻京可盡圭撮累以圭撮可峙坻京以神用者亦猶是也公笑曰鄭咸將逃壺子且期願矣往不佞數稱方仲子于方伯是釋笑可當中權方伯曰固然

君未窮季方耳仲子善育才故才著叔子不輕用故才全叔殆難爲兄矣司徒京兆居藩臬嘗與中丞同官則相告曰吾觀中丞而益知吾之佻也中丞口不失片言足不失跬步飲不卜夜食不品嘗卽飲食言動皆有常無論詎者其不佻如此始中丞在外傳好讀古書卽治博士家言喁喁道古及對公車令名動京師時方以作者屬中丞中丞優爲之矣中年乃屏文事置勿談且曰此壯夫不爲吾甚孱安事此夫人各有好至好則無以尚之中丞嫻於文辭好之至也雖有至好終不以其故而蔽精神他可知已然則善

用嗇者宜莫如中丞是即深根固蒂之道也譬之於
月以神用者魂也以形用者魄也中丞之少也其拙
乎中年則弦矣由今以往則望矣此不輕用之效文
恪公早見之江生之言驗矣非惟養生爲然也中丞
始出居州夫人莫程其力無所用力也既歷藩臬夫
人莫程其功無所用功也填撫海隅夫人莫程其度
無所用度也大盈若冲其用不窮中丞得之矣當世
民用日侈往往窮數澤以備遊觀中丞爲園直臨川
一亭環堵一室耳時而玩易時而誦詩若將終身以
忘世此之爲不用之用固將藏其用以待時此之爲

有國之母也是道也黃帝先之矣無勞爾形無搖爾精乃可以長生夫道之真以治身其緒餘以爲國家其土苴以治天下其道一也老氏得之黃帝故孔子師之中丞知其所由來矣於是相與班荆酒至起爲壽

孝友餘慶堂記

余自謁告居邑得二丞良先後甫及三年適以令遷去金故楚產余從家食得其人比喻少府入疆余業已目偉之矣即吾邑宜丞甚何翩翩得此兩君居頃之所部率推轂少府一考檄至乃得墊江三老謂余

司馬雅謂吾邑宜少府耳第能得少府于邑宜未得
少府于家要以家世不倍於人倫則祖禰之世澤厚
矣祖以稱詩自負而處士禰孳孳務明經祖嚮禰言
孺子何慕羶爲也古稱孝友爲政無寧逐逐以希儻
來孺子已矣處士唯唯尋釋業而務承驩居常視食
上下問衣燠寒有疾則衣帶必在躬湯藥必在御處
士雖謝佔俾其躬行無讓齊魯諸儒于是縣博士旅
舉鄉射賓之處士謝不往 穆考即位少府奉 詔
起澤官人言龐公遺之以安無若處士遺之以孝友
縣大夫署其堂曰孝友餘慶蓋亦以當表閭云夫列

邑貢士於廷率中歲以爲次間一奉

詔則舉擅塲

丞雖由此起家於邑爲貳其以令遷者什百而一則舉擅塲少府皆若承蜩而掇之此非朝夕之故矣風之積也不厚則其行易闕水之積也不厚則其流易膠腹望于颿風有餘怒腹堅于澤冰有餘寒不干其身于其子孫善有餘慶言重積也少府其席此哉余然其言蓋不忘其本者矣在禮大孝尊親其次弗辱其下能養乃若處士脩之於家者夫非善養也與哉父命之儒童習而白紛辱也父命之仕波流而乾沒辱也先帝首下明詔羅異材主上方破拘攣振

淹滯耽耽而欲得士無寧以一塗失之少府以彼其
資會逢其適命之儒則儒術振命之吏則吏治興蓋
庶幾弗辱矣比年詔求異等皆得與公車之士並
徵由此而譽命逮親令問顯世駸駸乎尊矣培之而
弗辱拓之而益尊要惟善養以爲基處士之所築也
漢治最爲近古其教率以孝弟力田治蜀莫良于文
翁而壹稟于躬化夫以邑則墊江爲儉以政則令爲
尊親親長長而天下平堯舜胥此道耳少府習家慶
以往第與境內共之即未及下車所不胥慶者非夫
也乃今奉檄而過里門省封樹歷戶庭而覲宗祏寧

無怵惕之心乎優然如將見之祖禰且欣欣有喜色
矣賓客之在是堂也宜必有張仲者其人幸爲我謝
曰夫夫之慶未艾也

季園記

嘉靖中吳季子以中書直廣內時尚方盛興作備遊
觀中書出入禁中無訶詰凡諸宮室苑囿臺沼山陵
靡不歷睹之矣太上端拱深居羣臣悉罷朝請中
書君退而休沐雅游諸勳貴間凡諸宮室苑囿臺沼
山陵靡不歷睹之矣中書君故攜李從父兄客廣陵
是皆鉅麗之都豪俠窟也凡諸宮室苑囿臺沼山陵

靡不歷睹之矣及其謝光祿歸商山商山席故饒傾
海陽居室大治會當更始諸兄則以部署屬中書君
于是相土宜操軌物倣將作授工師自門庭以及堂
皇莫不爽塏諸郡中巨室即完美無加焉既而割地
舍旁徧奉諸兄治別業地且盡中書君無所分指舍
後山歎曰天其以此佚我乎吾老此山足矣山方里
而羨故屬諸宗其先或購之卒難混一諸宗得中書
君甚至是悉歸中書君山之陽壁立數十仞皆石也
蓋居中而南面故名石壁山舍後阻商溪既濟則山
之麓也緣麓而臚列者九其中爲石壁山堂主人舉

丈夫子九人人授其一此其外舍也東爲衆香閣則仲氏以奉瞿曇澗道由遮源而入商溪出山堂後渡澗則樹屏而左右戶當山堂爲九苞堂堂閤以深其背乃面石壁水纍纍出石罅故曰珠泉堂上爲翔覽樓交疏四望翼如也翬如也主人故以鳳德稱其名則余竊取之矣樓當絕壁冠山爲清嘯亭遠眺黃白諸山出晴雲若青蓮可掣也九苞之右石楠生焉就隙地爲鶴林就澗之西爲浴鶴澗由石楠而上爲居業軒軒後多長松爲松門以出西北則松蘿亭也九苞之左爲東籬乘石磴陟古堂是曰懷橘先贈君嘗

樹千橘因志不忘下東磴見垣一方北面而屋曰蓮
宇池上有巖可避風雨池中樹夫容虛右个以待禪
棲曰壁觀室外古藤盤巖石上偃蹇若虬龍由蓮宇
而東則石梁當谿澗之會又東則臨流而爲樓者一
曰宜雨載流而爲閣者一曰涵虛此東略也徑由蓮
宇而上夾道皆長松徑折旋而夷屨剡剡起松下嘗
產芝草若干本爲臺曰芝臺又上爲撫松堂視懷橘
差小磴窮得地平曠多灌木陰當陽爲露葵齋亦以
飯開士露葵西上則清嘯矣由清嘯而北爲禮辰臺
臺下爲醉仙巖巖則巖居也巖居不垣而屋以巖當

之由巖居而徑北面則就衍爲承恩祠主人祠率先
贈君蔬果薪樵於山取給就巖阿爲鹿苑其西北爲
游鹿原中阿爲谷林堂席美蔭不受暑就谷口爲松
閣就鹿原爲鹿門此西北略也由露葵而東折爲振
衣岡循岡而臨皋羣松蒼然若積翠得平皋百步則
控岡皋爲亭馮高臨深其制最爲中度余病故名之
不稱也諸子請更之余謂主人業已及耆諸子殆將
爲主人壽爲主人壽宜莫如此亭天保之祝其稱如
者九焉亭悉有之矣九子之爲壽也其以是與遂更
名曰有如亭諸子敬諾夫吳會以名園蓋當世則山

詘而水羸新都保界羣山水詘矣其不詘者皆人力也卒莫能勝天是園都山水之間殆天勝矣工既訖主人署曰賁園余靳之曰何哉安得此博士語也世之闕觀者衆矣寧詎能見大而折衷之故敦茅土則已疏窮雕幾則已細擬尚方則已汰徇枯槁則已佞要非制之善也延陵季子夫非有吳之達禮樂者哉主人系出延陵其於諸兄則季也乃今不疏不細不汰不侵於禮樂爲近主人方以是爲菟裘矣季年怕于斯遂更名曰季園且爲之記

酒星亭記

陳丈人恂恂居新都顧深自負既醉輒仰天問曰斗
牛之域獨當文明其人斌斌宜必有應列星者若有
守者宜何星也其後丈人力脩古不干有司即藜藿
不厭津津然有味乎墳典都人士則以丈人抱處士
之義宜應少微 今上初壽星見南紀天官氏以爲
萬壽徵也其在草莽黃髮當之丈人方秉高尚享高
年宜應南極縣大夫鄉射東序壹以賓禮禮丈人文
人登大耋而象太丘都人士特睹其一隅耳昔太丘
非直譽鄉曲也且二子良乃今伯子簫克丈人家仲
子筌後瑞州駸駸由孝廉起後先相望則其氏同譽

同子姓同皆德星也會丈人考仲子之室縣大夫特
書棹楔命曰德星丈人避席曰嗟乎士不得志而山
林士之必至者也吾道窮而稅駕寧詎習智隱而爲
名高乎且吾由少賤故歷年多家故貧故諸子不失
逢掖有守且不敢辱都人士其將謂縣大夫何獨生
平慕叔夜嗣宗伯倫爲人而嚮淵明太白尤甚比目
卒業輒自引滿而醉二三醉則登城周游躊躇四顧
游既倦僊僊乎歸左正則左丘明太史在前陳思爲
客怠則屏賓旅臥游諸名山大川顧今年豪舉不
逮盛壯諸子舍供具當暑則日飲三升自涼及暄日

益者三之一足吾事矣吾其爲酒星乎仲子則以丈
人春秋高終不以其故廢飲即市居湫隘如之何不
杖而游乃卜地城南爲亭文溪之上居於是飲於是
庶幾無已太勞丈人曰嘻善乎孺子之息我游我也
海陽猶陸海耳其南則員嶠方壺吾亭東望城陽五
十里而近雲冉冉起吾方從負薪沽酒者游北望黃
山吾從列仙而餐沆瀣西望白嶽矐乎見雲中君子
壽宮南隱玉几可當攄梧神遊華胥氏之國吾樂矣
吾樂矣卜既吉將誓工師天游于過之恍然若將自
失仲子請曰筮幸得事夫子而夫子雅善家丈人筮

藉寵靈不自意獲布一席之地僅容膝下夫子恍然
若將自失何居天游子曰吾故高陽酒徒佐公孫朝
而傲子產久之不恤酒過身與名俱病焉吾大父司
馬公行年八十以上旬日而盡八斗終未嘗以酒名
家司馬少丈人者七年月飲足當丈人而減大父之
半每吾兄弟侍夕輒益一升酒盡猶程督闌人陶然
就寢倘有天幸其嬰鏢與丈人鈞旋思故吾卒歸於
亂尚安事酒且家司馬語吾兄弟願得一隩區以奉
餘年吾方求之亡何有之鄉芒乎未之得也吾與子
通家三世矣其世類無有差池顧子未得志而能恍

親吾得之而不可爲悅吾將甚慙於子惡在其不自
失哉丈人聞之曰噫長公過矣當長公之少也猶吾
之少也少故不羈司馬公既老而彊猶吾之老也老
故不亂奚不吾若也往吾就仲舍仲抱几進曰几出
良工願大人馮之觴者萬吾笑曰孺子忘疇昔矣昔
居陋巷家徒四壁立無几筵會歲除父子環敝庋而
飲皆盡驪乃今苟可以驪何取授几故作不若止有
名不若無名又奚不吾若也仲子咕咕喜曰昔之夜
有星當衡而殷南斗其光燭天家丈人謂質明宜有
異人來第援北斗酌酒漿相與沈飲亭上其人則夫

子也願徼惠下執事其何以照臨吾亭於是天游子爲之記

汴居記

陳仲子師事天游子道既通其家故貧環堵不蔽風雨仲子進則偶偶退則于于高視海陽廓然無以自託驟然笑曰海鳥有鵬其翼蔽天日之半徙之渤澥僅足以當一漚夫以筌之百體不脩於鵬而東南之隩斗牛之墟不儉於海與其受一廛而爲此拘拘也吾寧縱一箠以自如乃鳩匠石召虞衡尋斧斤登竹箭不終日而畢役汴汶陽而屋之不部不垣不奧不

昨戶牖具在不出跬步而窮八荒仲子居之視州里
猶之乎蟻垤耳天游子方受節司馬過汴居而問曰
異哉胡爲乎浮游胡爲乎中流爾廬爾居爾居爾廬
不築而汴雖利涉其焉如仲子避席對曰邑中七仞
相望比比高門一室千金曾不能五步使吾蜷局居
此其將如此七尺何茲吾爲此汴居也直將以天地
爲堂皇日月爲戶牖北極爲井幹列星爲榱題五岳
爲楹四瀆爲雷故雖東南之隕斗牛之墟譬則彈丸
眇乎小矣吾懼其廣不容靡安問趾哉吾將命馮夷
司楫河伯司維漁父作歌游靈鼓瑟乘流而下探投

轄問披裘折扶桑歷員躋游倦而歸也嗒然隱几遠
然繙書泱泱乎浩浩乎視航猶梯視川猶陸視今猶
古視人猶天夫子故嘗以天游自名皆是物也小子
不敏奈何樊澤雉而畜之天游子曰昔之善居室者
不越乎輪奐苞茂以爲言善矣美矣至人之居乃在
廣莫之野空明之鄉子其得之仲尼余何足以知此

谿上草堂記

夫擇地而趨砥名礪行則繩墨之士乎哉曾史是已
洸洋自恣巖棲川觀則龍蛇之士乎哉莊列是已世
儒率右曾史而左莊列目之曰天之放民其爲莊列

嗃矢者則又卑曾史而隸視之胡爲是規規乎彼其天之僂民也要之兩者是則俱是也非則俱非也奚必曾史之是莊列之非邪天游子自負不羈遊方之外語之無方則合語之有方則掩耳避之嘗客谿上而交主人亦既灑然異之矣主人矯矯乎其直也稜稜乎其廉也偶偶乎其獨行也兢兢乎其重發也魁乎其若岸也凜乎其若秋也一爲狂一爲狷宜不相謀主人視舉世若昌被顧由由然與天游子偕若適越而釋章甫天游子憚莊士若桎梏及其就主人也若登車而聞鑾和不可而可不然而然於是乎忘是

非矣主人皇皇在事務緩興作省遊觀春秋始耆業
已請老乃營草堂溪上逍遙以託餘年其言曰吾故
倦遊今幸得謝又幸而考閒居之室吾將與天游子
落之草堂去居第五十步而遙不杖可至戶西北爲
徑徑廣一軌可容安車徑窮而東出爲堂堂廣不及
四筵其深可容函丈堂之背南鄉爲歲書室五達客
書五車其上爲樓居視扶搖而上九萬里室南端樹
花木其南爲垣垣外畫爲一方近西爲沼沼上樹美
箭若嘉樹其中樹夫容東一方爲蔬畦主人茹淡於
此取給此其大氏也天游子曰嘻始吾與主人交吾

竊多其有守矣行年六十而六十化主人近之守勿
論也又十年而主人老矣更言曰吾以疾自廢凡諸
賓客之事不與焉乃今年考槃具在與我樂此者
其惟二三大夫于是得舍于其隣舍視草堂差廣王
人自命其堂曰華黍蓋將以明農事而襲豐年堂後
爲室五楹將以宿客墻東藝良田十畝脩兼草堂而
廣倍之爲期召二三大夫且爲旬日布衣之飲天游
子曰嘻始吾以槃樂而張主人猶食舊也七十而從
心所欲主人近之化勿論矣客曰竊聞曾史好脩莊
列任放士已脩則苦節已放則敗名顧用世者不病

脩而遺世者不病故亦各以其時行耳主人祀曾史而繹莊列其斯爲善始善終乎舉其全矣天游子曰固也在禮大夫稱老則休之國事則致之君家事則傳之子致則人其代之矣人豈不足君所乎即使堯舜而爲可傳猶不能必之子國雖可致家之謂何邑中二三大夫範馳驅如出一軌及其末路寧不思所稅駕哉要以孚翼不齊弓裘有待雖有餘力安得洋洋也者而樂之主人有才子四人嗣服無缺佚之以老厥有安居此非人所能爲皆天也客曰吾子誦法莊列逝將薄西極而徙南溟乃今得弛負擔視主人

蚤矣退求一室三歲不成湫隘與居擁腫與役吾不知其可也又奚以御風氣而天游天游子曰嘻吾故汗漫無家其涉世者非矣乃今不爲世用吾寧折節而守常且君在吾不得而有吾身親在吾不得而有吾子其斯天帝之懸未解吾將自立于張弛之間諸大夫善其言屬司馬氏爲之記諸大夫名氏載江漸江先生傳中

水嬉記

新都什九山也水幾一焉遊者浮慕江湖輒病其山羸而水詘余家食且久校四時以爲常暑雨祁寒視

四方同矣春淫爲患則南服同維時爲秋萬物咸說
及其杪也天地時察草木成章新都丘間相因林莽
相望天風既濟時乘于喁其粲若霞其錯若繡其陰
若紺其陽若朱其流若黃其凝若紫五章六采莫不
具陳且也三天子鄣經所謂南岷也其下源源時出
爲浙濫觴涼風始波潦水降矣淺則膚寸深則九淵
無不可以察溪毛占水族流沙積石皚皚磷磷遇風
爲湍遇石爲瀨望之如練如壁如瀑布如長虹即而
就之直中弦平中準其聲緩者中鳴玉急者中哀絃
余嘗扈上林遵太液巡海岳周游名山大川要以鉅

麗閔深則誠有之矣乃若紆錯采鏡空明小人有懷
不忘故土即山之羸猶以爲儉即水之詘無用其奢
矣五年九月余從諸弟登金竺山金竺中邑而名其
下則豐樂水也是日以登臨勝戴星始歸虎臣以疾
失期嗟甚其兄子仲實期余就里中爲水嬉適風雨
害游旬有五日乃如約豐樂水趨歛浦是爲中流浦
以上不可舟僅編竹而泝耳主人具泝十有六蓋奇
者半耦其半而四之耦差廣近方舟始足帳具于時
屋其一若樓船以坐賓主幕其一若步幄以貯歌人
其一若幔亭檐如也歌舞出焉其一庀行厨則宰夫

事奇者以其二繼樽簋其二載簫鼓爲前驅其二載諸監子若僕夫其二介紹而傳事既余從仲嘉至徐孝廉俞山人在焉日幾中乃就筏主人誓泝者畢班前後若舟師于是鼓之以鶯鶴進居人未之前覩也聚而堵觀主人方供菊數枝焚香啜茗而已少進聚觀者躡而從豈其于此乎觀禮樂哉蓋幔亭招之耳主人出歌者爲黃竹之歌歌三終觀者益集更進而就美蔭爲越吟躡者益前不能屏主人笑曰公等亦染指耳安能饜耳目乎于是驅而進之楫並舉既沂上游望中野羣木林林總總如濯蜀錦出西南西則

金盆倒影中流如奉員嶠西北則羣山高峙如列僊
擁羽蓋相迎靈山迤西如役羣龍劈積石其日秋陽
不厲魚鳥依人即沿石瀨蹠風湍其行不枳石梁在
目觀者業已逾之水濱歌人乃廢水調作鐃歌自度
不容驅馳則舍筏而登岸乃爲朱鷺爲君馬黃爲臨
高臺爲將進酒觀者疑張樂洞庭之野固不知其所
從來比及橋汊者淖矣主人夙已聚徒五百指疏前
塗日下春隕如萍實短牆長薄如良史槃礴所爲歌
人爲房中則以媚觀者于斯時也任耳則廢觀縱目
則奪聽即斂者不給矣日既納乃薄南臯召韓娥爲

緩聲爲淫哇者一洗之矣幔亭出二燎懸若火齊客
請樂而毋連乃班荆者既乘流下歌人迭出如初頃
之艤故干觀者倍昔主人脩無筭爵歌人亦競新聲
余節飲者十年是日醕者累百徑醉矣仲嘉謂士不
得志故悲秋伯兄遠得君而邇得親蓋亦自適其適
矣故及秋爲樂乃今賓主相得宜盡驩故醉虎臣雅
有酒過要亦骯髒者之爲茲既多主人能幸而佐客
驩甚虎臣適矣故獨醒時而醉時而醒其適均也客
以爲然併以授侍史

太函集卷之七十四

終